

# Naomh Pádraig, easpag Príomhéarlámh na hÉireann

15 Márta 2008  
Sollúntas

## Loinneog don Iontróid (Gein 12:1-2)

Imigh ó do thír féin agus ó do mhuintir féin agus ó theach d'athar chun na tíre a thaispeánfaidh mé duit.

Déanfaidh mé cine mór díot agus beannóidh mé thú agus mórfaidh mé d'ainm chomh mór sin go mbeidh sé mar bheannacht ag daoine.

## An Chomhurnaí

A Thiarna,

de bharr shaothar Naomh Pádraig in Éirinn

tá sé tar éis teacht linn rúndiamhair an aon fhíor-Dhia amháin a admháil

agus buíochas a ghabháil as ár slánú i gCríost;

de bharr a idirghuí deonaigh go gcoinneoidhne,

a cheiliúrann an fhéile seo,

tine an chreidimh, a d'adhain sé, beo i gcónaí inár measc.

Trínár dTiarna Íosa Críost do Mhac,

a mhaireann agus a rialaíonn leatsa,

mar aon leis an Spiorad Naomh, ina Dhia,

trí shaol na saol.

---

## Leicseanáir: Bliain ABC

### An Chéad Léacht: Sliocht as leabhar Shíorach (39:6-10)

*Ní rachaidh a chuimhne ar ceal agus mairfidh a ainm ó ghlúin go glúin.*

Más toil leis an Tiarna mór é,

líonfar é de spiorad na tuisceana;

titfidh briathra na heagnaíochta ina bhfrasa óna bhéal,

agus gabhfaidh sé buíochas le Dia san urnaí.

Cuirfidh sé dea-threoir ar a intinn agus ar a eolas,

agus déanfaidh sé machnamh ar a rúndiamhra folaithe.

Léireoidh sé an teagasc a tugadh dó,

agus beidh sé mórtasach as dlí chonradh an Tiarna.<sup>9</sup>

Molfaidh na sluaite a chumas tuisceana,

agus ní ligfear i ndearmad é go deo;

ní rachaidh a chuimhne ar ceal,

agus mairfidh a ainm ó ghlúin go glúin.

Fogróidh ciníocha a eagna,

agus comórfaidh an comhthionól a mholtaí.

Briathar Dé.

## Salm Loinneogach: Salm 115: 12-19. L v.12

Loinneog: Cén cúiteamh a dhéanfaidh mé leis an Tiarna ina ndearna sé dom?

Cén cúiteamh a dhéanfaidh mé leis an Tiarna ina ndearna sé dom?

Glacfaidh mé cupán an tslánaithe,

gairfidh mé ainm an Tiarna.

Díolfaidh mé mo mhóideanna leis an Tiarna

i bhfianaise a phobail.

Is luachmhar i láthair an Tiarna

bás a fhírén.

Is mise do ghiolla, a Thiarna,

sea, is mac do chailín aimsire;  
scaoil tú mo chuibhreacha.

Ofrálfaidh mé íobairt an bhuíochais duit;  
gairfidh mé ainm an Tiarna.  
Díolfaidh mé mo mhóideanna leis an Tiarna  
i bhfianaise a phobail,  
i gcúirteanna áras an Tiarna  
i gceartlár Iarúsailéim.

### **An Dara Léacht: Sliocht as dara litir Naomh Pól chuig Tiomóid (4:1-8)**

*Bí ag áitiú, ag casaoid, ag spreagadh agus ag teagasc go foighneach gan stad.*

I bhfianaise Dé agus i bhfianaise Chríost Íosa atá chun breithiúnas a thabhairt ar bheo agus ar mhairbh, achtaím ort dar a thaibhsiú agus dar a ríochtán briathar a fhógairt ar do dhícheall i dtráth agus in antráth. Bf ag áiteamh, ag casaoid, ag spreagadh agus ag teagasc go foighneach gan stad.

Tá an uair ag teacht nuair nach nglacfaidh daoine a thuilleadh leis an teagasc folláin. Ina ionad sin cruinneoidh siad múinteoirí ina dtimpeall a bheidh chun a dtola agus iad ar bís chun iad a chloisteáil; tabharfaidh siad an chluasbhodhar don fhírinne agus casfaidh siad ar na finscéalta. Ach bíse stuama staidéartha in gach ní; cuir suas leis an gcrúatan, déan do ghnó mar shoiscéalaí, comhlíon do dhualgas.

I dtaca liom féin de, táim do mo dhoirteadh amach cheana féin mar a bheadh deochíobartha agus tá uair na scarúna buailte liom.

Tá an comhrac maith tugtha agam, tá mo rás rite, tá an creideamh coinnithe agam. Tá craobh na fíréantachta in áirithe dom feasta agus bronnfaidh an Tiarna féin, an breitheamh cóir, orm í an lá sin agus ní ormsa amháin é ach ar an uile dhuine a bheidh ag tnúth lena thaibhsiú.

Briathar Dé.

### **Comhgháir an tSoiscéil: Séam 1:21**

Glóir duit, a Chríost: is tú Briathar Dé!  
Glacaigí go ceansa le Briathar Dé a síoladh ionaibh  
agus atá in ann bhur n-anam a shlánú,  
agus géill dó.  
Glóir duit, a Chríost: is tú Briathar Dé!

### **An Soiscéal: Sliocht as an Soiscéal naofa de réir Mhatha (13:24-32)**

*Is é an gráinnín síl is lú ar bith é, ach nuair a bhíonn sé fásta, is é is mó de na toir.*

Chuir Íosa parabal eile os a gcomhair: 'Is iad dála ríocht na bhflaitheas,' ar seisean, 'mar a bhí ag an duine a chuir síol maith ina ghort.

Ach fad a bhí an saol ina chodladh, bhí namhaid dó a tháinig ag scaipeadh cogail anuas ar an arbhar, agus d'imigh. Tháinig an t-arbhar aníos ina gheamhar, agus ansin ina dhias agus an uair sin chonacthas an cogal freisin. Tháinig a chuid sclábhaí go dtí an fear tí agus dúirt siad leis: "A mháistir, an síol a chuir tú i do ghort, nach síol maith a bhí ann? Agus cad a thug an cogal ann más ea?" Dúirt sé leo: "Namhaid éigin a rinne an méid sin." "Agus ar mhaith leat," deir na sclábhaí leis, "go rachaimis á bhailiú chun a chéile?" "Ná déanaigí," ar seisean, "ar eagla, nuair a bheadh sibh ag bailiú an chogail, go sracfadh sibh an t-arbhar aníos san am céanna. Fágтар le hais a chéile ag fás iad araon go dtí an fómhar, agus nuair a bheidh an fómhar á dhéanamh déarfaidh mé leis na buanaithe: Bailígí an cogal chun a chéile ar dtús, agus déanaigí punanna de chun a dhóite. Ach cruinnígí an t-arbhar isteach i mo scioból."

Chuir sé parabal eile os a gcomhair: 'Is cosúil ríocht na bhflaitheas,' ar seisean, 'le gráinne de shíol mustaird a thóg duine agus a chuir sé ina ghort. Is é an gráinnín síl is lú ar bith é, ach nuair a bhíonn sé fásta, bíonn sé ar an gceann is mó de na glasraí agus déantar crann de, a bhféadann éanlaith an aeir dul ar foscadh ina chraobhacha.'

Soiscéal Dé.

---

**Bliain B más mian**

**An Chéad Léacht: Sliocht as leabhar Irimia fáidh 1:4-9**

*Téigh anois chuig gach duine chuig a gcuirfidh mise thú.*

**Salm Loinneogach: Salm 116 L Mc 16:15**

Loinneog: Imígí faoin domhan uile; fógraíí an dea-scéal.

**An Dara Léacht: Sliocht as litir Naomh Pól chuig na Rómhánaigh 10:9-18**

*Is ó theagasc a thagann creideamh, trí bhriathar Chríost.*

**Comhgháir an tSoiscéil: Mth 29:19-20**

Glóir duit, a Chríost: is tú Briathar Dé!

Imígí, déanaigí deisceabail de na náisiúin uile, a deir an Tiarna.

Féach, táim in éineacht libh i gcónaí go dtí deireadh an tsaoil.

Glóir duit, a Chríost: is tú Briathar Dé!

**An Soiscéal: Sliocht as an Soiscéal naofa de réir Mharcais 16:15-20**

*D'imigh siad leo agus chraobhscaoil siad an dea-scéal i ngach áit.*

**Bliain C más mian**

**An Chéad Léacht: Sliocht as leabhar Amós 7:12-15**

*Ba é an Tiarna a thóg mé ón mbuachailleacht.*

**Salm Loinneogach: Salm 138: 1-3.7-10.13-14. L v.9-10**

Loinneog: Má ghabhaim cónaí i gcríocha imchiana na farraige ansin féin beidh tú ag tabhairt aire dom.

**An Dara Léacht: Sliocht as céadlitir Naomh Pól chuig na Teasalónaigh 2:2-8**

*Ní dhearnamar plámás libh riamh agus ní ar scáth na sainte a bhíomar.*

**Comhgháir an tSoiscéil: Lc 4:18-19**

Glóir duit, a Chríost: is tú Briathar Dé!

Chuir an Tiarna uaidh mé

ag tabhairt an dea-scéil do na bochta,

ag fógairt a scaoilte do bhraighde.

Glóir duit, a Chríost: is tú Briathar Dé!

**An Soiscéal: Sliocht as an Soiscéal naofa de réir Lúcais 5:1-11**

*'Is peacach mé, a Thiarna.'* Dúirt Íosa *'Ná bíodh eagla ort.'*

**Os Cionn na nOfrálacha**

A Thiarna,

glac leis an íobairt fhíorghlan seo

a ofrálann do phobal buíoch duit

de bharr shaothar Naomh Pádraig

chun glóir d'ainm.

Trí Chríost ár dTiarna.

**An Phreafáid**

S Go raibh an Tiarna libh.

P Agus leat féin.

S Tógaigí bhur gcroí in airde.

P Tá sé tógtha in airde chun an Tiarna againn.

S Gabhaimis buíochas leis an Tiarna Dia.

P Is ceart agus is cóir sin.

Is ceart agus is cóir dúinn go deimhin,

is é ár ndualgas agus ár slánú é

buíochas a ghabháil leat de shíor agus i ngach áit,

# Naomh Pádraig, easpag Príomh-earlamh na hÉireann

a Thiarna, a Athair naofa, a Dhia uilechumhachtaigh shíoraí,  
agus thú a mholadh go cuí  
agus sinn ag tabhairt ómóis do Naomh Pádraig.

Óir trína phaidreoireacht laethúil  
le linn dó bheith i ngéibheann agus ag fulaingt cruatain  
thug tú air thú a aithint mar Athair grámhar.  
Thogh tú é as a raibh ar domhan  
chun filleadh ar thír na ndaoine a rinne príosúnach de  
i dtreo is go n-admhóidís Íosa Críost, a Slánaitheoir.  
Trí chumhacht do Spioraid threoraigh tú a bhealaí  
ionas gur éirigh leis clann mhac agus iníonacha na nÉireannach  
a iompú chun seirbhís Dé Thrí-aonta.

Le croíthe lúcháireacha canaimidne atá sa saol seo  
mar a chanann na haingil ar neamh  
agus iad ag moladh do ghlóire gan stad:

Is naofa, naofa, naofa...

## Loinneog don Chomaoineach (Cf. Mth 8:11)

Tiocfaidh mórán anoir agus aniar  
agus beidh siad ina suí chun boird  
le hAbrahám agus le hÍosac agus le Iacób i ríocht na bhflaitheas,  
a deir an Tiarna.

## An Iarchomaoineach

Neartaigh sinn tríd an tsacraimint seo, a Thiarna,  
i dtreo is go ndéanfimid an creideamh a theagasc Naomh Pádraig  
a admháil agus a fhógairt  
trínár modh maireachtála.  
Trí Chríost ár dTiarna.

## Beannacht Shollúnta

Beannacht Shollúnta  
Dia an tAthair,  
a thionól le chéile sinn  
le féile Naomh Pádraig a cheiliúradh,  
go mbeannaí sé sibh, go gcosnaí sé sibh  
agus go gcoinní sé sibh  
dílis don chreideamh i dtólamh.  
P. Amen.

Go raibh Críost, an Tiarna,  
Ardrí na bhflaitheas,  
i ngar daoibh i gcónaí  
agus go gcumhdaí sé sibh ar an olc.  
P. Amen.

Go ndeonáí an Spiorad Naomh,  
foinse gach naofachta,  
go mbeidh sibh lán de ghrá do phobal Dé.  
P. Amen.

Agus go dtaga beannacht Dé uilechumhachtaigh,  
Athair, Mac † agus Spiorad Naomh,  
anuas oraibh agus go bhfana libh de shíor.  
P. Amen.